

72068

1



公羊傳序

昔者孔子有云吾志在春秋行在孝  
經此二學者聖人之極致治世之要  
務也傳春秋者非一本據亂而作其  
中多非常異義可怪之論說者疑惑  
至有倍經任意反傳違戾者其勢雖  
間不得不廣是以講誦師言至於百





萬猶有不解時如讓朝之辭援引他  
經失其句讀以無為有甚可閔笑者  
不可勝記也是以治古學貴文章者  
謂之俗儒至使賈逵緣隙奮筆以為  
公羊可奪左氏可興恨先師觀聽不  
決多隨二創此世之餘事斯豈非守  
文持論敗績失據之過哉余竊悲之  
久矣往者畧依胡毋生條例多得其  
正故遂隱括使就繩墨焉漢何休撰

春秋公羊傳隱公卷第一

元年春王正月

元年者何君之始年也春者何歲之始也王者孰謂謂文王也曷爲先言王而後言正月王正月也何言乎王正月大一統也公何以不言即位成公意也何成乎公之意公將平國而反之桓曷爲反之桓桓幼而貴隱長而卑其爲尊卑也微國人莫知隱長又賢諸大夫桓隱而立之隱於是焉而辭立則未知桓之將必得立也且如桓立則恐諸大夫之不



能相幼君也故凡隱之立爲栢立也隱長又  
賢何以不宜立立適以長不以賢立子以貴  
不以長栢何以貴母貴也母貴則子何以貴  
子以母貴母以子貴

三月公及邾婁儀父盟于昧

及者何與也會及暨皆與也曷爲或言會或  
言及或言暨會猶最也及猶汲汲也暨猶暨  
暨也及我欲之暨不得已也儀父者何邾婁  
之君也何以名字也曷爲稱字襄之也曷爲  
襄之爲其與公盟也與公盟者衆矣曷爲獨

襄乎此因其可襄而襄之此其爲可襄奈何  
漸進也昧者何地期也

夏五月鄭伯克段于鄆

克之者何殺之也殺之則曷爲謂之克大鄭  
伯之惡也曷爲大鄭伯之惡母欲立之已殺  
之如勿與而已矣段者何鄭伯之弟也何以  
不稱弟當國也其地何當國也齊人殺無知  
何以不弟在內也在內雖當國不地也不當  
國雖在外亦不地也

秋七月天王使宰咺來歸惠公仲子之賵

宰者何官也啗者何名也曷為以官氏宰士也惠公者何隱之考也仲子者何桓之母也何以不稱夫人桓未君也贈者何喪事有贈贈者蓋以馬以乘馬束帛車馬曰贈貨財曰賻衣被曰襚桓未君則諸侯曷為來贈之隱為桓立故以桓母之喪告于諸侯然則何言爾成公意也其言來何不及事也其言惠公仲子何兼之兼之非禮也何以不言及仲子仲子微也

九月及宋人盟于宿

孰及之內之微者也

冬十有二月祭伯來

祭伯者何天子之大夫也何以不稱使奔也奔則曷為不言奔王者無外言奔則有外之辭也

公子益師卒

何以不日遠也所見異辭所聞異辭所傳聞異辭

春秋公羊傳隱公卷第一



春秋公羊傳隱公卷第二

二年春公會戎于潛

夏五月莒人入向

入者何得而不居也

無駭帥師入極

無駭者何展無駭也何以不氏貶曷為貶疾  
始滅也始滅昉於此乎前此矣前此則曷為  
始乎此託始焉爾曷為託始焉爾春秋之始  
也此滅也其言入何內大惡諱也

秋八月庚辰公及戎盟于唐

九月紀履緌來逆女

紀履緌者何紀大夫也何以不稱使婚禮不稱主人然則曷稱稱諸父兄師友宋公使公孫壽來納幣則其稱主人何辭窮也辭窮者何無母也然則紀有母乎曰有有則何以不稱母母不通也外逆女不書此何以書譏何譏爾譏始不親迎也始不親迎於此乎前此矣前此則曷為始乎此託始焉爾曷為託始焉爾春秋之始也女曷為或稱女或稱婦或稱夫人女在其國稱女在塗稱婦入國稱夫人

冬十月伯姬歸于紀

伯姬者何內女也其言歸何婦人謂嫁曰歸紀子伯莒子盟于密

紀子伯者何無聞焉爾

十有二月乙卯夫人子氏薨

夫人子氏者何隱公之母也何以不書葬成公意也何成乎公之意子將不終為君故母亦不終為夫人也

鄭人伐衛

三年春王二月



已巳日有食之

何以書記異也日食則曷爲或日或不日或言朔或不言朔曰某月某日朔日有食之者食正朔也其或日或不日或失之前或失之後失之前者朔在前也失之後者朔在後也

三月庚戌天王崩

何以不書葬天子記崩不記葬必其時也諸侯記卒記葬有天子存不得必其時也曷爲或言崩或言薨天子曰崩諸侯曰薨大夫曰卒士曰不祿

夏四月辛卯尹氏卒

尹氏者何天子之大夫也其稱尹氏何貶曷爲貶譏世卿世卿非禮也外大夫不卒此何以卒天王崩諸侯之主也

秋武氏子來求賻

武氏子者天子之大夫也其稱武氏子何譏何譏爾父卒子未命也何以不稱使當喪未君也武氏子來求賻何以書譏何譏爾喪事無求求賻非禮也蓋通于下

八月庚辰宋公和卒

冬十有二月齊侯鄭伯盟于石門

癸未葬宋繆公

葬者曷為或日或不日不及時而日渴葬也  
不及時而不日慢葬也過時而日隱之也過  
時而不日謂之不能葬也當時而不日正也  
當時而日危不得葬也此當時何危爾宣公  
謂繆公曰以吾愛與夷則不若愛女以為社  
稷宗廟主則與夷不若女盍終為君矣宣公  
死繆公立繆公逐其二子莊公馮與左師勃  
曰爾為吾子生母相見死母相哭與夷復曰

先君之所為不與臣國而納國乎君者以君  
可以為社稷宗廟主也今君逐君之二子而  
將致國乎與夷此非先君之意也且使子而  
可逐則先君其逐臣矣繆公曰先君之不爾  
逐可知矣吾立乎此攝也終致國乎與夷莊  
公馮弒與夷故君子大居正宋之禍宣公為  
之也

四年春王二月莒人伐杞取牟婁

牟婁者何杞之邑也外取邑不書此何以書  
疾始取邑也



戊申衛州吁弒其君完

曷爲以國民當國也

夏公及宋公遇于清

遇者何不期也一君出一君要之也

宋公陳侯蔡人衛人伐鄭

秋翬帥師會宋公陳侯蔡人衛人伐鄭

翬者何公子翬也何以不稱公子貶曷爲貶  
與弒公也其與弒公奈何公子翬諂乎隱公  
謂隱公曰百姓安子諸侯說子盍終爲君矣  
隱曰吾否吾使脩塗裘吾將老焉公子翬恐

若其言聞乎桓於是謂桓曰吾爲子口隱矣  
隱曰吾不反也桓曰然則奈何曰請作難弒  
隱公於鍾巫之祭焉弒隱公也

九月衛人殺州吁于濮

其稱人何討賊之辭也

冬十有二月衛人立晉

晉者何公子晉也立者何立者不宜立也其  
稱人何衆立之之辭也然則孰立之石碯立  
之石碯立之則其稱人何衆之所欲立也衆  
雖欲立之其立之非也

春秋公羊傳隱公卷第二

春秋公羊傳隱公卷第三

五年春公觀魚于棠

何以書譏何譏爾遠也公曷爲遠而觀魚登  
來之也百金之魚公張之登來之者何美大  
之之辭也棠者何濟上之邑也

夏四月葬衛桓公

秋衛師入盛

曷爲或言率師或不言率師將尊師衆稱某  
率師將尊師少稱將將卑師衆稱師將卑師  
少稱入君將不言率師書其重者也



九月考仲子之宮

考宮者何考猶入室也始祭仲子也栢未君則曷為祭仲子隱為栢立故為栢祭其母也然則何言爾成公意也

初獻六羽

初者何始也六羽者何舞也初獻六羽何以書譏何譏爾譏始僭諸公也六羽之為僭奈何天子八佾諸公六諸侯四諸公者何諸侯者何天子三公稱公王者之後稱公其餘大國稱侯小國稱伯子男天子三公者何天子

之相也天子之相則何以三自陝而東者周公主之自陝而西者召公主之一相處乎內始僭諸公昉於此乎前此矣前此則曷為始乎此僭諸公猶可言也僭天子不可言也邾婁人鄭人伐宋

螟

何以書記災也

冬十有二月辛巳公子彊卒

宋人伐鄭圍長葛

邑不言圍此其言圍何彊也

六年春鄭人來輸平

輸平者何輸平猶墮成也何言乎墮成敗其成也曰吾成敗矣吾與鄭人未有成也吾與鄭人則曷為未有成孤壤之戰隱公獲焉然則何以不言戰諱獲也

夏五月辛酉公會齊侯盟于艾

秋七月

此無事何以書春秋雖無事首時過則書首時過則何以書春秋編年四時具然後為年冬宋人取長葛

外取邑不書此何以書久也

七年春王三月叔姬歸于紀

滕侯卒

何以不名微國也微國則其稱侯何不嫌也春秋貴賤不嫌同號美惡不嫌同辭

夏城中丘

中丘者何內之邑也城中丘何以書以重書也

齊侯使其弟年來聘

其稱弟何母弟稱弟母兄稱兄



秋公伐邾婁

冬天王使凡伯來聘

戎伐凡伯于楚丘以歸

凡伯者何天子之大夫也此聘也其言伐之何執之也執之則其言伐之何大之也曷為大之不與夷狄之執中國也其地何大之也八年春宋公衛侯遇于垂

三月鄭伯使宛來歸郕

宛者何鄭之微者也郕者何鄭湯沐之邑也天子有事于泰山諸侯皆從泰山之下諸侯

皆有湯沐之邑焉

庚寅我入郕

其言入何難也其日何難也其言我何言我者非獨我也齊亦欲之

夏六月己亥蔡侯考父卒

辛亥宿男卒

秋七月庚午宋公齊侯衛侯盟于瓦屋

八月葬蔡宣公

卒何以名而葬不名卒從正而葬從主人卒何以日而葬不日卒赴而葬不告

九月辛卯公及莒人盟于包來

公曷為與微者盟稱人則從不疑也

螟

冬十有二月無駭卒

此展無駭也何以不氏疾始滅也故終其身

不氏

九年春天王使南季來聘

三月癸酉大雨震電

何以書記異也何異爾不特也

庚辰大雨雪

何以書記異也何異爾倣甚也

狹卒

狹者何吾大夫之未命者也

夏城郎

秋七月

冬公會齊侯于邠

十年春王二月公會齊侯鄭伯于中丘

夏鞏帥師會齊人鄭人伐宋

此公子翬也何以不稱公子貶曷為貶隱之罪人也故終隱之篇貶也



六月壬戌公敗宋師于菅

辛未取郟辛巳取防

取邑不日此何以日一月而再取也何言乎一月而再取甚之也內大惡諱此其言甚之何春秋錄內而略外於外大惡書小惡不書於內大惡諱小惡書

秋宋人衛人入鄭

宋人蔡人衛人伐載鄭伯伐取之其言伐取之何易也其易奈何因其力也因誰之力因宋人蔡人衛人之力也

冬十月壬午齊人鄭人入盛

十有一年春滕侯薛侯來朝

其言朝何諸侯來曰朝大夫來曰聘其兼言之何微國也

夏五月公會鄭伯于祁黎

秋七月壬午公及齊侯鄭伯入許

冬十有一月壬辰公薨

何以不書葬隱之也何隱爾弒也弒則何以不書葬春秋君弒賊不討不書葬以爲無臣子也子沈子曰君弒臣不討賊非臣也不復

公羊傳卷三  
隱公  
五  
讎非子也葬生者之事也春秋君弑賊不討  
不書葬以為不繫乎臣子也公薨何以不地  
不忍言也隱何以無正月隱將讓乎桓故不  
有其正月也

春秋公羊傳隱公卷第三

春秋公羊傳桓公卷第四

元年春王正月公即位

繼弑君不言即位此其言即位何如其意  
也

三月公會鄭伯于垂

鄭伯以璧假許田

其言以璧假之何易之也易之則其言假之  
何為恭也曷為為恭有天子存則諸侯不得  
專地也許田者何魯朝宿之邑也諸侯時朝  
乎天子天子之郊諸侯皆有朝宿之邑焉此



魯朝宿之邑也則曷爲謂之許田諱取周田也諱取周田則曷爲謂之許田繫之許也曷爲繫之許近許也此邑也其稱田何田多邑少稱田邑多田少稱邑

夏四月丁未公及鄭伯盟于越

秋大水

何以書記災也

冬十月

二年春王正月戊申宋督弑其君與夷及其大夫孔父

及者何累也弑君多矣舍此無累者乎曰有仇牧荀息皆累也舍仇牧荀息無累者乎曰有有則此何以書賢也何賢乎孔父孔父可謂義形於色矣其義形於色奈何督將弑殤公孔父生而存則殤公不可得而弑也故於是先攻孔父之家殤公知孔父死已必死趨而救之皆死焉孔父正色而立於朝則人莫敢過而致難於其君者孔父可謂義形於色矣

滕子來朝

三月公會齊侯陳侯鄭伯于稷以成宋亂  
內大惡諱此其目言之何遠也所見異辭所  
聞異辭所傳聞異辭隱亦遠矣曷為為隱諱  
隱賢而相賤也

夏四月取郕大鼎于宋

此取之宋其謂之郕鼎何器從名地從主人  
器何以從名地何以從主人器之與人非有  
即爾宋始以不義取之故謂之郕鼎至于地  
之與人則不然俄而可以為其有矣然則為  
取可以為其有乎曰否何者若楚王之妻媼

無時焉可也

戊申納于大廟

何以書譏何譏爾遂亂受賂納于大廟非禮  
也

秋七月紀侯來朝

蔡侯鄭伯會于鄧

離不言會此其言會何蓋鄧與會爾

九月入杞

公及我盟于唐

冬公至自唐



三年春正月公會齊侯于贏

夏齊侯衛侯晉命于蒲

晉命者何相命也何言乎相命近正也此其為近正奈何古者不盟結言而退

六月公會紀侯于盛

秋七月壬辰朔日有食之既

既者何盡也

公子翬如齊逆女

九月齊侯送姜氏于讙

何以書譏何譏爾諸侯越竟送女非禮也此

入國矣何以不稱夫人自我言齊父母之於

子雖為鄰國夫人猶曰吾姜氏

公會齊侯于讙夫人姜氏至自齊

輦何以不致得見乎公矣

冬齊侯使其弟年來聘

有年

有年何以書以喜書也大有年何以書亦以

喜書也此其曰有年何僅有年也彼其曰大

有年何大豐年也僅有年亦足以當喜乎特

有年也

四年春正月公狩于郎

狩者何田狩也春曰苗秋曰蒐冬曰狩常事不書此何以書譏何譏爾遠也諸侯曷爲必田狩一曰乾豆二曰賓客三曰充君之庖

夏天王使宰渠伯糾來聘

宰渠伯糾者何天子之大夫也其稱宰渠伯糾何下大夫也

五年春正月甲戌巳丑陳侯鮑卒

曷爲以二日卒之也甲戌之日亡巳丑之日死而得君子疑焉故以二日卒之也

夏齊侯鄭伯如紀

外相如不書此何以書離不言會也

天王使仍叔之子來聘

仍叔之子者何天子之大夫也其稱仍叔之子何譏何譏爾譏父老子代從政也

葬陳桓公

城祝丘

秋蔡人衛人陳人從王伐鄭

其言從王伐鄭何從王正也

大雩



大雩者何旱祭也然則何以不言旱言雩則  
旱見言旱則雩不見何以書記災也

蠲

何以書記災也

冬州公如曹

外相如不書此何以書過我也

六年春正月寔來

寔來者何猶曰是人來也孰謂謂州公也曷  
為謂之寔來慢之也曷為慢之化我也

夏四月公會紀侯于成

秋八月壬午大閱

大閱者何簡車徒也何以書蓋以罕書也

蔡人殺陳佗

陳佗者何陳君也陳君則曷為謂之陳佗絕  
也曷為絕之賤也其賤奈何外淫也惡乎淫  
淫于蔡蔡人殺之

九月丁卯子同生

子同生者孰謂謂莊公也何言乎子同生喜  
有正也未有言喜有正者此其言喜有正何  
久無正也子公羊子曰其諸以病栢與

冬紀侯來朝

春秋公羊傳栢公卷第四

春秋公羊傳栢公卷第五

七年春二月己亥焚咸丘

焚之者何樵之也樵之者何以火攻也何言  
乎以火攻疾始以火攻也咸丘者何邾婁之  
邑也曷爲不繫乎邾婁國之也曷爲國之君  
存焉爾

夏穀伯綏來朝鄧侯吾離來朝

皆何以名失地之君也其稱侯朝何貴者無  
後待之以初也

八年春正月己卯烝



烝者何冬祭也春曰祠夏曰禘秋曰嘗冬曰烝常事不書此何以書譏何譏爾譏亟也亟則黷黷則不敬君子之祭也敬而不黷疏則怠怠則忘士不及茲四者則冬不裘夏不葛天王使冢父來聘

夏五月丁丑烝

何以書譏亟也

秋伐邾婁

冬十月雨雪

何以書記異也何異爾不時也

祭公來遂逆王后于紀

祭公者何天子之三公也何以不稱使婚禮不稱主人遂者何生事也大夫無遂事此其言遂何成使乎我也其成使乎我奈何使我為媒可則因用是往逆矣女在其國稱女此其稱王后何王者無外其辭成矣

九年春紀季姜歸于京師

其辭成矣則其稱紀季姜何自我言紀父母之於子雖為天王后猶曰吾季姜京師者何天子之居也京者何大也師者何眾也天子

之居必以衆大之辭言之

夏四月

秋七月

冬曹伯使其世子射姑來朝

諸侯來曰朝此世子也其言朝何春秋有譏

父老子代從政者則未知其在齊與曹與

十年春王正月庚申曹伯終生卒

夏五月葬曹桓公

秋公會衛侯于桃丘弗遇

會者何期辭也其言弗遇何公不見要也

冬十有二月丙午齊侯衛侯鄭伯來戰于郎

郎者何吾近邑也吾近邑則其言來戰于郎

何近也惡乎近近乎圍也此偏戰也何以不

言師敗績內不言戰言戰乃敗矣

十有一年春正月齊人衛人鄭人盟于惡曹

夏五月癸未鄭伯寤生卒

秋七月葬鄭莊公

九月宋人執鄭祭仲

祭仲者何鄭相也何以不名賢也何賢乎祭

仲以為知權也其為知權奈何古者鄭國處



于留先鄭伯有善于鄆公者通乎夫人以取其國而遷鄭焉而野留莊公死已葬祭仲將往省于留塗出于宋宋人執之謂之曰爲我出忽而立突祭仲不從其言則君必死國必亡從其言則君可以生易死國可以存易亡少遼緩之則突可故出而忽可故反是不可得則病然後有鄭國古人之有權者祭仲之權是也權者何權者反於經然後有善者也權之所設舍死亡無所設行權有道自貶損以行權不害人以行權殺人以自生亡人以

自存君子不爲也

突歸于鄭

突何以名挈乎祭仲也其言歸何順祭仲也

鄭忽出奔衛

忽何以名春秋伯子男一也辭無所貶

柔會宋公陳侯蔡叔盟于折

柔者何吾大夫之未命者也

公會宋公于夫童

冬十有二月公會宋公于闕

十有二年春正月

夏六月壬寅公會紀侯莒子盟于郕蛇

秋七月丁亥公會宋公燕人盟于穀丘

八月壬辰陳侯躍卒

公會宋公于郊

冬十有一月公會宋公于龜

丙戌公會鄭伯盟于武父

丙戌衛侯晉卒

十有二月及鄭師伐宋丁未戰于宋

戰不言伐此其言伐何辟嫌也惡乎嫌嫌與

鄭人戰也此偏戰也何以不言師敗績內不

言戰言戰乃敗矣

十有三年春二月公會紀侯鄭伯已巳及齊侯

宋公衛侯燕人戰齊師宋師衛師燕師敗績

曷為後日恃外也其恃外奈何得紀侯鄭伯

然後能為日也內不言戰此其言戰何從外

也曷為從外恃外故從外也何以不地近也

惡乎近近乎圍即亦近矣即何以地即猶可

以地也

三月葬衛宣公

夏大水



秋七月

冬十月

十有四年春正月公會鄭伯于曹

無冰

何以書記異也

夏五鄭伯使其弟語來盟

夏五者何無聞焉爾

秋八月壬申御廩災

御廩者何粢盛委之所藏也御廩災何以書記災也

乙亥嘗

常事不書此何以書譏何譏爾譏嘗也曰猶嘗乎御廩災不如勿嘗而已矣

冬十有二月丁巳齊侯祿父卒

宋人以齊人衛人蔡人陳人伐鄭

以者何行其意也

十有五年春二月天王使冢父來求車

何以書譏何譏爾王者無求求車非禮也

三月乙未天王崩

夏四月己巳葬齊僖公

五月鄭伯突出奔蔡

突何以名奪正也

鄭世子忽復歸于鄭

其稱世子何復正也曷為或言歸或言復歸復歸者出惡歸無惡復入者出無惡入有惡入者出入惡歸者出入無惡

許叔入于許

公會齊侯于鄆

邾婁人牟人葛人來朝

皆何以稱人夷狄之也

秋九月鄭伯突入于櫟

櫟者何鄭之邑曷為不言入于鄭末言爾曷為未言爾祭仲亡矣然則曷為不言忽之出奔言忽為君之微也祭仲存則存矣祭仲亡則亡矣

冬十有一月公會齊侯宋公衛侯陳侯于侈伐鄭

十有六年春正月公會宋公蔡侯衛侯于曹

夏四月公會宋公衛侯陳侯蔡侯伐鄭

秋七月公至自伐鄭



冬城向

十有一月衛侯朔出奔齊

衛侯朔何以名絕曷為絕之得罪于天子也

其得罪于天子奈何見使守衛朔而不能使

衛小眾越在岱陰齊屬負茲舍不即罪爾

十有七年春正月丙辰公會齊侯紀侯盟于黃

二月丙午公及邾婁儀父盟于雒

五月丙午及齊師戰于奚

六月丁丑蔡侯封人卒

秋八月蔡季自陳歸于蔡

癸巳葬蔡桓侯

及宋人衛人伐邾婁

冬十月朔日有食之

十有八年春王正月公會齊侯于濼

公夫人姜氏遂如齊

公何以不言及夫人夫人外也夫人外者何

內辭也其實夫人外公也

夏四月丙子公薨于齊

丁酉公之喪至自齊

秋七月

冬十有二月己丑葬我君桓公

賊未討何以書葬雖在外也雖在外則何以書葬君子辭也

春秋公羊傳桓公卷第五

春秋公羊傳莊公卷第六

元年春王正月

公何以不言即位春秋君弑子不言即位君弑則子何以不言即位隱之也孰隱隱子也三月夫人孫于齊

孫者何孫猶孫也內諱奔謂之孫夫人固在齊矣其言孫于齊何念母也正月以存君念母以首事夫人何以不稱姜氏貶焉為貶與弑公也其與弑公奈何夫人譖公於齊侯公曰同非吾子齊侯之子也齊侯怒與之飲酒



於其出焉使公子彭生送之於其乘焉擗幹而殺之念母者所善也則曷爲於其念母焉貶不與念母也

夏單伯逆王姬

單伯者何吾大夫之命乎天子者何可以不稱使天子召而使之也逆之者何使我主之也曷爲使我主之天子嫁女乎諸侯必使諸侯同姓者主之諸侯嫁女于大夫必使大夫同姓者主之

秋築王姬之館于外

何以書譏何譏爾築之禮也于外非禮也于外何以非禮築于外非禮也其築之何以禮主王姬者必爲之改築主王姬者則曷爲必爲之改築於路寢則不可小寢則嫌羣公子之舍則以卑矣其道必爲之改築者也

冬十月乙亥陳侯卒

王使榮叔來錫桓公命

錫者何賜也命者何加我服也其言桓公何追命也

王姬歸于齊

何以書我主之也

齊師遷紀邢鄆郟

遷之者何取之也取之則曷爲不言取之也爲襄公諱也外取邑不書此何以書大之也何大爾自是始滅也

二年春王二月葬陳莊公

夏公子慶父帥師伐於餘丘

於餘丘者何邾婁之邑也曷爲不繫守邾婁國之也曷爲國之君存焉爾

秋七月齊王姬卒

外夫人不卒此何以卒錄焉爾曷爲錄焉爾我主之也

冬十有二月夫人姜氏會齊侯于郟

乙酉宋公馮卒

三年春王正月溺會齊師伐衛

溺者何吾大夫之未命者也

夏四月葬宋莊公

五月葬桓王

此未有言崩者何以書葬蓋改葬也

秋紀季以鄫入于齊



紀季者何紀侯之弟也何以不名賢也何賢  
乎紀季服罪也其服罪奈何魯子曰請後五  
廟以存姑姊妹

冬公次于郎

其言次于郎何刺欲救紀而後不能也

四年春王二月夫人姜氏饗齊侯于祝丘

三月紀伯姬卒

夏齊侯陳侯鄭伯遇于垂

紀侯大去其國

大去者何滅也孰滅之齊滅之曷為不言齊滅

之為襄公諱也春秋為賢者諱何賢乎襄公  
復讎也何讎爾遠祖也哀公身乎周紀侯諸  
之以襄公之為於此焉者事祖禰之心盡矣盡  
者何襄公將復讎乎紀卜之曰師喪分焉寡  
人死之不為不吉也遠祖者幾世乎九世矣  
九世猶可以復讎乎雖百世可也家亦可乎  
曰不可國何以可國君一體也先君之恥猶  
今君之恥也今君之恥猶先君之恥也國君  
何以為一體國君以國為體諸侯世君國君  
為一體也今紀無罪此非怒與曰非也古者

有明天子則紀侯必誅必無紀者紀侯之不  
誅至今有紀者猶無明天子也古者諸侯必  
有會聚之事相朝聘之道號辭必稱先君以  
相接然則齊紀無說焉不可以並立乎天下  
故將去紀侯者不得不去紀也有明天子則  
襄公得爲若行乎曰不得也不得則襄公曷  
爲爲之上無天子下無方伯緣恩疾者可也  
六月乙丑齊侯葬紀伯姬

外夫人不書葬此何以書隱之也何隱爾其  
國亡矣徒葬於齊爾此復讎也曷爲葬之滅  
其可滅葬其可葬此其爲可葬奈何復讎者  
非將殺之逐之也以爲雖遇紀侯之殯亦將  
葬之也

秋七月

冬公及齊人狩于郕

公曷爲與微者狩齊侯也齊侯則其稱人何  
諱與讎狩也前此者有事矣後此者有事矣  
則曷爲獨於此焉譏於讎者將壹譏而已故  
擇其重者而譏焉莫重乎其與讎狩也於讎  
者則曷爲將壹譏而已讎者無時焉可與通



通則爲大譏不可勝譏故將壹譏而已其餘  
從同同

五年春王正月

夏夫人姜氏如齊師

秋倪黎來來朝

倪者何小邾婁也小邾婁則曷爲謂之倪未  
能以其名通也黎來者何名也其名何微國  
也

冬公會齊人宋人陳人蔡人伐衛

此伐衛何納朔也曷爲不言納衛侯朔辟王

也

六年春王三月壬子突救衛

壬人者何微者也子突者何貴也貴則其稱  
人何繫諸人也曷爲繫諸人壬人耳

夏六月衛侯朔入于衛

衛侯朔何以名絕曷爲絕之犯命也其言入  
何篡辭也

秋公至自伐衛

曷爲或言致會或言致伐得意致會不得意  
致伐衛侯朔入于衛何以致伐不敢勝天子

也

蟻

冬齊人來歸衛寶

此衛寶也則齊人為為來歸之衛人歸之也  
衛人歸之則其稱齊人何讓乎我也其讓乎  
我奈何齊侯曰此非寡人之力魯侯之力也  
七年春夫人姜氏會齊侯于防

夏四月辛卯夜恒星不見夜中星霄如雨

恒星者何列星也列星不見何以知夜之中  
星反也如雨者何如雨者非雨也非雨則曷

為謂之如雨不脩春秋曰雨星不及地尺而  
復君子脩之曰星霄如雨何以書記異也

秋大水

無麥苗

無苗則曷為先言無麥而後言無苗一災不  
書記無麥然後書無苗何以書記災也

冬夫人姜氏會齊侯于穀

春秋公羊傳莊公卷第六



春秋公羊傳莊公卷第七

八年春王正月師次于郎以俟陳人蔡人

次不言俟此其言俟何託不得已也

甲午祠兵

祠兵者何出曰祠兵入曰振旅其禮一也皆習戰也何言乎祠兵爲久也曷爲爲久吾將以甲午之日然後祠兵於是

夏師及齊師圍成成降于齊師

成者何盛也盛則曷爲謂之成諱滅同姓也曷爲不言降吾師辟之也

秋師還

還者何善辭也此滅同姓何善爾病之也曰師病矣曷為病之非師之罪也

冬十有一月癸未齊無知弑其君諸兒

九年春齊人殺無知

公及齊大夫盟于暨

公曷為與大夫盟齊無君也然則何以不名為其諱與大夫盟也使若眾然

夏公伐齊納糾

納者何入辭也其言伐之何伐而言納者猶

不能納也糾者何公子糾也何以不稱公子

君前臣名也

齊小白入于齊

曷為以國氏當國也其言入何篡辭也

秋七月丁酉葬齊襄公

八月庚申及齊師戰于乾時我師敗績

內不言敗此其言敗何伐敗也曷為伐敗復

讎也此復讎乎大國曷為使微者公也公則

曷為不言公不與公復讎也曷為不與公復

讎復讎者在下也



九月齊人取子糾殺之

其取之何內辭也脅我使我殺之也其稱子糾何貴也其貴奈何宜為君者也

冬浚洙

洙者何水也浚之者何深之也曷為深之畏齊也曷為畏齊也辭殺子糾也

十年春王正月公敗齊師于長勺

二月公侵宋

曷為或言侵或言伐捕者曰侵精者曰伐戰不言伐圍不言戰入不言圍滅不言入書其

重者也

三月宋人遷宿

遷之者何不通也以地遷之也于沈子曰不通者蓋因而臣之也

夏六月齊師宋師次于郎公敗宋師于乘丘

其言次于郎何伐也伐則其言次何齊與伐而不與戰故言伐也我能敗之故言次也

秋九月荆敗蔡師于莘以蔡侯獻舞歸

荆者何州名也州不若國國不若氏氏不若人人不若名名不若字字不若子蔡侯獻舞

何以名絕曷為絕之獲也曷為不言其獲不與夷狄之獲中國也

冬十月齊師滅譚譚子奔莒

何以不言出國已滅矣無所出也

十有一年春王正月

夏五月戊寅公敗宋師于鄆

秋宋大水

何以書記災也外災不書此何以書及我也

冬王姬歸于齊

何以書過我也

十有二年春王三月紀叔姬歸于鄆

其言歸于鄆何隱之也何隱爾其國亡矣徒

歸于叔爾也

夏四月

秋八月甲午宋萬弑其君接及其大夫仇牧

及者何累也弑君多矣舍此無累者乎孔父

荀息皆累也舍孔父荀息無累者乎曰有有

則此何以書賢也何賢乎仇牧仇牧可謂不

畏彊禦矣其不畏彊禦奈何萬嘗與莊公戰

獲乎莊公莊公歸散舍諸宮中數月然後歸



之歸反為大夫於宋與閔公博婦人皆在側  
萬曰甚矣魯侯之淑魯侯之美也天下諸侯  
宜為君者唯魯侯爾閔公矜此婦人妬其言  
顧曰此虜也爾虜焉故魯侯之美惡乎至萬  
怒搏閔公絕其脰仇牧聞君弑趨而至遇之  
于門手劔而叱之萬臂撥仇牧碎其首齒著  
乎門闔仇牧可謂不畏疆禦矣

冬十月宋萬出奔陳

十有三年春齊侯宋人陳人蔡人邾婁人會于  
北杏

夏六月齊人滅遂

秋七月

冬公會齊侯盟于柯

何以不日易也其易奈何栢之盟不日其會  
不致信之也其不日何以始乎此莊公將會  
乎栢曹子進曰君之意何如莊公曰寡人之  
生則不若死矣曹子曰然則君請當其君臣  
請當其臣莊公曰諾於是會乎栢莊公升壇  
曹子手劔而從之管子進曰君何求乎曹子  
曰城壞厭竟君不圖與管子曰然則君將何

求曹子曰願請汶陽之田管子顧曰君許諾  
桓公曰諾曹子請盟桓公下與之盟已盟曹  
子標劍而去之要盟可犯而桓公不欺曹子  
可讎而桓公不怨桓公之信著乎天下自柯  
之盟始焉

十有四年春齊人陳人曹人伐宋

夏單伯會伐宋

其言會伐宋何後會也

秋七月荆入蔡

冬單伯會齊侯宋公衛侯鄭伯于鄆

十有五年春齊侯宋公陳侯衛侯鄭伯會于鄆

夏夫人姜氏如齊

秋宋人齊人邾婁人伐兒

鄭人侵宋

冬十月

十有六年春王正月

夏宋人齊人衛人伐鄭

秋荆伐鄭

冬十有二月公會齊侯宋公陳侯衛侯鄭伯許

男曹伯滑伯滕子同盟于幽



同盟者何同欲也

邾婁子克卒

十有七年春齊人執鄭瞻

鄭瞻者何鄭之微者也此鄭之微者何言乎齊人執之書甚佞也

夏齊人濊于遂

濊者何濊積也衆殺戍者也

秋鄭瞻自齊逃來

何以書書甚佞也曰佞人來矣佞人來矣

冬多麋

何以書記異也

春秋公羊傳卷第七

公羊傳卷七

卷七

七





